

4buba ITI Kohima Convocation sentong agiogo



ITI Convocation sentong nung DC Kohima-i kuli kaket agütsüba noksa nung angur

Dimapur, Mongputeni/ October 4 (TYO): Government ITI Kohima 4buba Convocation sentong October 4 nü ITI Kohima Complex nung agiogo. Sentong nung alaketa jaoker Kohima Deputy Commissioner B. Henok Buchem, NCS-i graduate asüba trainee tem dang nükjidong tulu ayutsü aser kanga kara melechia aoba lima ka nung parnok indang sempettem senti süa amshitsü ajungshi.

Technology kanga kara renloka aoba indang jembiba mapang Buchem-i, Artificial Intelligence (AI) yagi mapa aika melentsü akok, saka skilled trade tem yabo teti nüngdaksü, ta ashi. "AI yagi plumbers, electricians, carpenters, aser mechanics mapa memelentetsü. Kisüjensü aser tanga service sector tem nung skilled worker tem teti nüngdaksü," ta paisa shisem.

Paisa, department aser district administration na longjemer skilled worker tem mapa inyaksü atema maongka agütsütsü asoshi online sabang

ka lapoktsütsü benokdang, koba ajanga local employment jenjang ajungkettsü.

Trainee tem dang nükla yur sentong yanglutsü ajungshia DC-i parnok dang mapang tatsüka aser mapang agia ataloktsüba nükjidongtem ayutsü, saka parnok sentongtem tangar nem memetdaksütsü ajungshi. "Nü sentongtem tangra ajak dang shira kari aji agitsü akok mesüra nai tamakok ngura menüsütsü akok. Takok agi jembidakjang," ta pai ashi.

Pa tajangshiba indang jembiba mapang Buchem-i, pa tekübokba jenjang nungi tenzüka indang bilemtetshia jemi aser temulungtetba tulu nung meranga inyakba ya pa ina aoba nung kanga tongtibang liasü, koba pai par tsürapur nungi angazük ta ashi. "Na iba tashi tonga aruogo anungji nü lenmang aia tou," ta pai ashi.

Maneni DC-i, "nai angazükba trade dang masü saka tanga-a inyaksü merangang. Nisung kar dang sorkar mapa angutsü anungji

private mapa dena inyakang, kechiyong nükla idakji tuluba lir. Nü mapa nendaka aser temulungsentsü temerek agi inyakang," ta ashi.

DC-isa, "tanü lokti nung makoktsü ta bilemertem aika lir, saka alimabo odang aotsü aser tarutsüji tasü aiterem meyong lir," ta ashi.

Buchem-isa, ITI Kohima Principal Er. Enchiba Longkumer nem tenügsang agütsü aser pa ya district nung kanga dang tedangshi aser professional officer rongnung ka lir ta ashi. "nenok pa lenisüba nung training agiba ya kanga tia taka," ta pai kaketshirtem dang ashi.

Taküm kaketshir 160 institute nungi pass süogo. Sentong nung Principal ITI Kohima Er. Enchiba Longkumer-i lokti pela agizükba o jemi aser Pastor MHBC, Vimegokho Chüsi-i, pass asüba trainee tem atema sarasademtsü. Kesalhokho Casavi aser Senbeni M Yanthan nati faculty aser pass-out trainee tem tenüng nung o jemi.

Indisen yimtsüng nung MSMEPCI office semzükogo

Dimapur, Mongputeni/ October 4 (TYO): Micro, Small & Medium Enterprises Promotion Council of India (MSMEPCI) indang Dimapur District Office October 3 nü Indisen yimtsüng nung Trinity Tower anasa Orchid Square nung lapokogo.

Iba sentong ya MSMEPCI Dimapur District Vice Chairman Aosashi Longkumer lenisüba nung agi. Sentong nung Indisen Baptist Church Rev. Sentianger-i Tsüngrem temaotsü meshizüka sarasadem aser MSMEPCI District Chairman Washipong Longkumer-i lokti pela agizükba o jembia liasü.

Advisor for Transport & Technical Education, Temjenmenba, shiba tongti tejaoker liasü, pai rongsenketzüng nung maongkatem atsülangtsü aser sorkar mapa dak metaloker aliba tajemba kümdaksütsü asoshi MSME tem tashi itshtitsü koda tongtibang iba indang lemsatepa liasü. Paisa, sorka sector khuret tali kümogo aser mapa takhangba aliba ya meperidaksütetsü ta ashi. Iba tetsükdaksü ya kottetsü atema lanurtemi entrepreneurship, skill-based enterprises aser tanga mapa balala bushiteta aotsü atema inyaksü paisa lemsatepa liasü.

Temjenmenba-i, Skills, TaFMA, aser IDAN amala department temi lanurtem sangrasangji ya tajunglen



Temjenmenba

amshidaktsütsü atema parnok nem luyim balala nung sabang agüja arudar, ta ashi.

Sentong nungsa Deputy Commissioner of Dimapur, Dr. Tinojongshi Chang-i, MSMEPCI office ya mapang shitak nung lapokogo ta ashi. Pai, Naga nung ya azümesen ta ashiba ya shitak masü ta ashi, saka lanurtem aikati white-collar mapa atema dang bilemer ta ashi.

Sorkar mapa kanga ajema aliba mapang, small-scale enterprises, aluyimba aser allied sector tem nung lenmang sadema lapoka lir ta DC-i ashi. Pai, Chief Minister's Micro Finance Scheme amala scheme tem ya entrepreneur tem nem tetyari agütsütsü atema lir ta ashi. Pai lanurtem dang training agitsü aser len sayudaksütsü atema MSMEPCI office nung züngoksemtsü ajungshiba den district administration-i Dimapur

nung entrepreneurship atema takokba tashi teyari agütsütsü ta ashi.

Kasa mapang nung MSMEPCI Nagaland State Chairman, Lanuakum Jamir-i, office tasenba ya entrepreneurs, startups aser shishilemba balala atema lenmang bushiba aser teyari nüngdaka aliba lanurtem atema resource hub ka asütsü ta ashi. Pai, micro, small, aser medium enterprise tem ya India rongsenketzüng tongtirtet lir ta shia Nagaland nung aliba lanurtem dang sorkar mapa dak dang memetaloki entrepreneurship nung pei tashi intoktsü ayongzük.

Maneni sentong nung Dimapur Municipal Council CEO Thungchanbemo Tungoe-i, iba office lapokba ya office ka lapokba dang masü saka maongkatem lapokba lir ta ashi. Paisa, MSMEPCI-i small aser micro entrepreneur tem dak rangloker inyaksüla ta ashi. Pai lanurtem dang tasü ita shishilembatem tenzüksü aser atsülangyonga aotsü ajungshia liasü. Paisa, Dimapur Municipal Council-i grassroots level nung entrepreneurship akangshitsü atema MSMEPCI den sendaktepa inyaksü ta ashi.

Iba sentong ya MSMEPCI Dimapur District Vice Chairman Sentimeren Jamir-i tepela o jembiba den Rev. Dr. Temjen Ozukum-i sarasadem tembanga liasü.

Nagaland Angh-i Yemshe aser Tsokum benjung salem lemsatep

Dimapur, Mongputeni/ October 4 (TYO): Nagaland Angh Ajay Kumar Bhalla-i sangdong ka ajanga Pochury nung aser Nagaland nung aliba nüburtem den Yemshe benjung salem lemsatepogo.

Benjung koba temeim, tejangraba aser pelatepa amunger, iba ya alu junga rodaksüba atema Tulusang nem tenügsang agütsüba aser yimjiyimjung atema sarasadema amungba benjung ka lir.

Iba ajanga lokti telongjem, takar sobaliba aser kati ka taoba ta züngshitepba telongjem tanüla sayur.

Yemshe benjung ajanga tepela aser temaotsü ajak nem bener arujang aser telongjem tali

tashi itshidakjang ta sarasademja ataba Angh-isa lemsatep.

Kasa mapang nung Angh-i ano Khiamniungan nungertem den Tsokum benjung salem lemsatepogo.

Tsokum ya Khiamniungan nungertem benjung tongtiba lir. Iba benjung ya temaotsütem atema Tulusang nem tenügsang agütsüba aser tarutsü anogotem nung yimjiyimjung aser anema aliba temaotsü meshizüka amungba benjung ka lir.

Iba benjung ajanga telongjem tali akangshitsü, yimjung adokdaksütsü aser takar sobaliba wazüka ayutsü imlaja ataba DC-isa lemsatepogo.

Meluri nung Yemshe den repsema Mini Hornbill benjung mungogo



Yemshe den repsema Mini Hornbill festival sentong nung Advisor, Urban Development & Municipal Affairs, Zhalio Rio-i jempiba noksa angur.

Dimapur, Mongputeni/ October 4 (TYO): Pochury nung aser Yemshe den repsema Mini Hornbill festival October 3 nü Meluri nung Advisor, Urban Development & Municipal Affairs, Zhalio Rio alaketa jaoker liasü.

Yemshe ya Pochury kin benjung tongtiba lir, koba kümshia October 1 nungi 5 tashi amunger.

Sentong nung o jembiba mapang Zhalio Rio-i, küm tepeyong meranga inyakba sülen Yemshe benjung amungba atema pa pelaba lemsatepba den mapa minyak alu kanga junga arutsü ta bilembajibo tai lir ta ashi.

Benjung chief host Advisor

for New & Renewable Energy and NSDMA, Z. Nyusietho Nyuthe-i ashiba agi, Meluri ya Nagaland nung district rongnung tanobusang lir aser iba district dang "Land of Fortunes" ta ajaba ya shitak lir, kechiyong district nung alirongsen aika lir, aser iba ya bushiteta amshitsü aser rongsenketzüng nung renloka aotsü asoshi lenmang sadema lapoka lir.

Sentong nung Pochury Hoho Chonpa Curry tiri lokti pela agizükba o jemi aser Meluri Deputy Commissioner K. Mhathang Tsanglao-i salem osang lemsatepa liasü.

Sentong ya Jitsiarho Po aser Kuojirhongu Kajiri na lenisüba nung agi.

SBI Kohima branch nung angati health camp agi



Dimapur, Mongputeni/ October 4 (TYO): State Bank of India (SBI) Kohima branch nung October 4 nü pensioner, customer aser employee tem atema angati health check-up camp ka ayongzüka katsüogo. Iba camp ya "Your health, our priority" omen nung ajemdaker agia liasü.

Iba health camp ya State Bank of India Kohima Branch aser Chief Medical Officer, Kohima na longjemer

ayongzüka agiogo. Health check-up aser screening ya National Tuberculosis Elimination Program, National Health Mission Nagaland, Nagaland State AIDS Control Society, aser National Viral Hepatitis Control Program nungi doctor aser health worker temi agia liasü.

Medical camp mapang ajak senteper pensioner, customer aser employee noklang ka shi temang tendangogo.

EC-i Bihar nung yimtenren party tem den senden amen



October 04, 2025 nü Patna nung Chief Election Commissioner, Gyanesh Kumar den Election Commissioners- Sukhbir Singh Sandhu aser Vivek Joshi nungeri Bihar nung party 12 nungi lenirtem den senden amendang tangokba noksa nung angur.

New Delhi, Mongputeni/ October 04 (Agencies): Bihar nung assembly election agitsü mapang ana nung lia Honibarnü Election Commission (EC)-i Bihar nung recognised party ajak den senden ka ayongzüka election agitsü anogotem aser election shilem kwi lemsar agitsüar iba atemaji lemtepogo, ta ketdangsertemi metetdaksü.

Chief election commissioner Gyanesh Kumar aser election commissioner ana- Dr Sukhbir Singh Sandhu aser Dr Vivek Joshi, Bihar nung chief electoral officer Vinod Singh Gunjyal aser election ketdangsertem aika iba senden nungji aden.

Election teladak süa kanga junga agitetsü atema yimtenren party temi shilem agitsüla, ta shia EC-i party tem dang, election timi agitsü atema polling booth ajak nung polling agents

shimmang, ta mepishia metetdaksü.

Party balala nungi lenirtemi, Chhath benjung temli election ayongzüka agitsüla, ibaji ajanga dang voters aikati shilem agitetsü, ta metetdaksü.

Party temisa, akokba tashi election shilem ishika dang lemsar agitsüla, ta ashi.

Janata Dal (United) nungi MP, Sanjay Kumar Jha-ibo EC dang, Bihar nung tensa tajungba kümdar, anungji kenüyongi dang election agitsüla, ta ashi.

Tesülen osangbenertem den jembidang Jha-i, "Onoki election commission den onok tebilemba lemsatepogo. Bihar nung special intensive revision (SIR) agiogo aser SIR ji koma agirar Bihar-i linük dang sayutsü. Onoki EC dang election ji kenüyongi agiadoktsüla ta shiogo. Bihar nung tensa junga lir.

Maharashtra nung kenüyongi election agitetra Bihar nungbo magitetsü asü?"ta ashi.

Osangbener den jembidang RJD MP, Abhay Kushwaha-i, "Onoki EC dang election ji anogo ana lemsar agitsüla ta shiogo. Onoki election commission nem takhangba onük kar metetdaksüogo. RJD lenir Tejashwi Yadav-i tezüluba nung takhangba agütsüba ama onokia tezüluba nung agütsüogo," ta metetdaksü.

Paisa, "Onoki EC dang voters list nungi agienba tenüng 3,66,000 ji sangdongang ta shiogo. Tenüng agiena alirtem danga tashishiba ken o agüjang ta ni mepishir," ta metetdaksü.

Election commission-i kobi melii election agitsü anogotem sangdongtsü imlar, aser October ita tatembanglen election agitsüa akok, ta osang ka ajanga metetdaksü.

Jamui nung address ka kija nung voters 247 aliba Congress-i ashishi

Patna, October 04 (Agencies): Honibarnü Patna nung Election Commission (EC)-i ayongzüka senden nung Bihar state Congress-i state nung Special Intensive Revision (SIR) agiba sülen voters list nung tashishitsü aika aliba metetdaksü.

Senden tembangba sülen osangbenertem den jembidang Bihar Congress Tir Rajesh Kumar Ram-i, "Jamui nung address ka kija nung voters 247 lir. Muzaffarpur nung nisung ka tenüng voters list nung aiben züngoka lir. Tesem kar nungbo asürtem tenünga voters list nung züngoka lir aser tesem kar

nung voters aika tebu tenüng kasa amshia lir," ta metetdaksü.

Ram-i, "EC-i parnoki January ita nunga election agitsü renema lir ta ashi saka SIR indang ochi maneni adoker," ta metetdaksü.

"Congress-i takhangba aika agütsüogo; mezüngbuba nung September 30 nü sangdongba voters list nung tangalenü oa alirtem tenüng agienadoktsüla. Tanabuba nung, Form-6 ajanga tenüng tasen million 2.153 b e n d e n l o k b a j i metetdaksütsüla," ta pai ashi.

Paisa, "Parnok arrshi küm-a metetdaksütsüla, kechiyong Form-6 nung voters tasen aika

lir. Ajisüaka arrshi küm 70-75 purtem-a aika züngokogo. Tasembuba nung, tetsür kwi tenüng indok aser tasen kwi züngok? Tenüng agienba aser bendenlokbaji kechi kuli ajanga? Item osang ajakji agütsütsüla," ta pai ashi.

"Pezübuba nung, asürtem tenünga sangdongtsüla. EC-i iba mapatong (SIR) ya bendangertem nokdangtsü atema ta shiogo. Ajisüaka tang tashi nung EC ket nung bendangertem tenüng kata register süa mali. Pongububa nung, bendangertem tenüngji sangdongtsüla, ta onoki akhanger," ta Ram-i metetdaksü.

Cyclone Shakti agi Maharashtra nung district aika kongshitsü

New Delhi, October 04 (Agencies): Arabian tzüym nung yipru mopung tesashi 'Cyclone Shakti' kümtetogo, aser iba yipru agi Maharashtra nung district aika kongshitsü, ta India Meteorological Department (IMD)-i metetdaksüogo.

Talisa iba yipru agi Maharashtra nung tzüymkümlen alirtem kongshitsü; iba yipru ajanga tzüym nung tzüsem sashia atutsü aser October 7 tashi tzünglu sashia arutsü.

Cyclone Shakti ya October 2 nü Arabian tzüym nung low-pressure area ka nung kümteta liasü aser iba mapang nungjagi tenzüka iba yipru tesashiba dang akümer.

Taküm North Indian Ocean basin nungbo iba yipru ya mezüng asütsü. "Shakti" nüngja ya mezüng Sri Lanka-i agüja liasü.

Tang iba yipru ya Gujarat kübok Naliya nungi kilometer 270 shi pilar lir. IMD-i advanced satellite monitor aser ocean buoys amshia iba yipru asadangdar.

Cyclone Shakti ya west-southwestward tsütsüleni aotsü aser October 5 tashi nung west-central Arabian Sea regions atongtsü.

Maharashtra nung Relief & Rehabilitation department-i tzüymkümlen aliba district trok-Mumbai, Thane, Palghar,

Raigad, Ratnagiri aser Sindhudurg nung alirtem dang tekümdangtsü metetdaksüogo.

Tzüymkümlen mopung ghonda ka nung kilometer 45-65 kera aontsü aser kilometer 70 tashi-a kera aontsüa akok, tzüym nung tzüsem metre 4-5 tashi atutsü aser tzüymkümlen tzünglu 100-200 mm tashi arutsü.

Gujarat state disaster management authority-ia Kutch, Jamnagar aser Porbandar district tem nung aliba nüburtem dang kümdanga alitsü metetdaksüogo.

Maharashtra aser Gujarat sorkar napronglai angopurtem dang angopui tzüymi maotsü aser tzüymkümlen alirtem danga kanga kümdanga alitsü metetdaksüogo.

Maharashtra state sorkari district administrations dang iba yipru atema renema alitsü tuyuba den külemi tzüymkümlen alirtem aniteta emergency shelters nung jenokdaksütsü atema renema liang, ta tuyuogo.

Local administrations-i tensa apir police, fire brigade aser National Disaster Response Force (NDRF) teams den külemi kümüzüka maparen inyaksü.

Sorkari sensotem danga tzünglu sashia aruba mapang kidang nungi mayazüksü aser ketdangsertemi metetdaksüba osangtem mita alitsü tuyuogo.



New Delhi, October 04, 2025: Honibarnü New Delhi nung lanurtem atema mapatong balala tenzüksüba sentong ka nung Ato kilonser Narendra Modi aser Union Minister of State for Skill Development & Entrepreneurship (Independent Charge), Jayant Chaudhary na tangokba noksa nung angur.

Jammu & Kashmir nung Rajya Sabha election atema Secular Front tenteter

New Delhi, October 04 (Agencies): October 26 nü Jammu & Kashmir nung Rajya Sabha by election nung Congress party-i parnok leniba nung secular teloktep ka tentettsü atema National Conference (NC) den jembidar aser tanga party tem teyari meshia Rajya Sabha menden pezüprongla nung tokteptsü tebilemba lir.

2021 küm PDP MP ana- Mir Mohammad Fayaz aser Nazir Ahmed Laway na den BJP MP Shamsher Singh aser Congress MP Ghulam Nabi Azad nunger kümsük agi atongba sülen item menden pezü azingteta liasü.

NC-i menden asem nung takok angutsüsa züngsem peria lir, saka Congress-i menden pezübuba nunga takok angutsü nükjidadong nung tanga party teyari bushir.

2022 küm election nung

National Conference-i menden 42 nung takok ngua liasü; BJP-i menden 29, Congress-i menden trok, People's Democratic Party (PDP)-i menden asem, Peoples Conference (PC)-i menden ka, Communist Party of India (Marxist)-CPI(M)-ia menden ka aser Aam Aadmi Party (AAP)-ia menden ka nung takok ngua liasü. Independent candidates-i menden tenet nung takok ngua liasü.

Taruba Rajya Sabha election nung NC-Congress-i menden asem nung takok angutsüsa züngsem peria lir aser menden pezübuba nungjia takok angutsü nükjidadong nung parnoki tanga party teyari bushir.

NC-Congress-i PDP, People's Conference, Awami Itihaad Party (AIP), CPI(M), AAP aser Independents dang nungi teyari meshitsü.



October 04, 2025 nü Bhutan nung India Foreign Secretary, Vikram Misri-i Bhutan Ato kilonser, Tshering Tobgay den senden amendang tangokba noksa nung angur.



TIR YIMYIM YIMOBILEM (EDITRIAL)

DIMAPUR SUNDAY, OCTOBER (MONGPUTENI) 05, 2025

Tsüngrem taochi

Alima nung nisung tuluba nungi tilaba tashi, takar aser sensaker ajak Tsüngrem taochi agidang alir. Tsüngrem taochi ajanga asenok ajak iba limai aru aser anogo shia Tsüngrem taochi agi aochizüka asenok lendong aser timtem nungi kümzüka alir. Tsüngrem taochi agi asenok taküm kümzüka aser mapa nung takok angubatem asenoki aiben mejangjatsüa akok, kechiyong asenok anema alidang aser temang nung tashi itta alidang inyaktetba mapatem ajak ya asenoki asenoksasa inyaktet amato bilemer. Asenoki aiben asenoki kenyongi makoktsü ta bilemba mapatem dang Tsüngremi inyaktettsü ta bilemer saka kechisa asenoki asenoksasa Tsüngrem sayatenya tashi tenük agi mengui inyaktetter, itemjibo Tsüngrem medeni asenoksasa asenoki inyaktet ama asenoki bilemer. Ajisüaka, kechisa asenoki inyakter, item mapa tilatiba kata asenoki Tsüngrem tashi aser taochi medeni inyaktettsü makok. Tsüngremi maochira asenok taküm aliyonga asenoksasabo jajaa moutettsü, o mejembitettsü, mechiyongtettsü, amui moutettsü aser teboka süng junga moutettsü. Itemji anogo shia asenoki Tsüngrem tashi medeni inyaktetba ama bilema inyakba mapatem kar lir. Aji oda, Paul taküm nunga Tsüngrem taochi mamatsü atema Tsüngremi pa temang nung timtem ka agütsü ta 2 Korint 12:7 nung shia lir. Paul ya aso tajung, tasü aser tashi tait nisung ka liasü. Pa taküm nung Yisu Khrista agizüker Osang tajung sayutsüngia jajadanga aiben pai pa anemer lokti ajuru saka pai itemji kokteta osang tajung sayutsüngia jaja. Pai Yisu tenüng nung tasür dena shia arudaktsü. Pa ajanga Tsüngrem sayatenya mapa jenti inyak. Ajisüaka, pai item ajakji pa ajungba agi, pa uluba agi aser pa tasü aser tashi aitba agi inyaktetba ama bilem südi. Ashiko, kenkenbo pai sayatenya mapa inyakba aser junga sayutsüngitetba jagi pa asüküma bilema alitsü akok. Ibayongji, Tsüngremi pa temang nung timtem ka agütsü. Ajisüaka Paul-i iba timtem agütsüba nükjiongji mangatet. Ashiko, pa temang nung timtem alibaji mojingi agütsüba timtem ta bilema aiben mojinga arütsür alitsüa akok. Aji oda, Paul-i pa temang nung timtem alibaji alima atakatem nungi aruba timtemang ka amto bilema Tsüngrem dang taneptsü meshia sarasadem. Pai tangarbo jungtsü aser tasür a shia arudaktsü, saka pa mang nung timtem tilaka alibabo pasasa pai maneptsütet. Idangji dang Paul-i Tsüngrem tashi aser taochi angatet. Temang nung kecha timtem malidangbo peisasa mapa ajak inyaktet amato asüküma bilema liasü saka kodang timtem agi atong, idangji dang Paulia Tsüngrem medeni taküm alitsü makokba tashi aser taochi angatet. Aji oda, asenoki aiben asenok junga ali tashi asenoksasa alir amato bilemer aser timtem arudang Tsüngremi asenok maochir amato bilemer. Ajisüaka, kodang Paul-i Tsüngrem dang pa mang nung timtem aliba anepjang ta asemben tashi mepishi, Tsüngremi ashi, temang nung tashidak liaka, "Kü taochi na asoshi teperi, kechiyong Kü tashijibo tashimait mapang nungang junga meteter." Aji oda, Paul-i idangjidang Tsüngrem taochi tali angtet anungji nemnemtsü melen pai ashi, " Anungji, Khrista ain kü dak alitsü asoshi ni kanga pelashishia kü mekokmein nung uludi. Aji asünung, Khrista atema mekokmein nung, sensamasatsüba nung, talira timtema inyakba nung, rishikangshi aser lendongtem nung, ni temulung uludi. (2 Koring 12-9-10). Aji oda, asen taküm nunga asen tashi aitba, asen ajungba aser aseni kanga junga inyaktetba mapatem kar alitsüa akok. Ajisüaka, idangji asenok kanga kumdangtsüla, kechiyong itemji Tsüngrem taochi medeni kecha meinyaktet. Aiben asenok Tsüngrem nungi piladaktsübaji asen timtem agi masü saka asenok tashi itta alidang ataloker. Aji oda, asenok temang nung mekokmein kar alitsüa akok saka iba jagi Tsüngremi asen dak tali temulung lemtettsüsa lira, ibajiang temoatsüba. Asen timtem aser mekokmein mapang menemnemli, kechiyong iba jagi Tsüngrem tashi aser taochi tali tajungba meteter.

OLEMSABANG

Shi aser Tanela nung Teintet Rogo Kümükümshiba

~ K.Temjen Jamir.

(Iba ya 2025 küm September 19 nü Dimapur District Ao Pensioners Telungjem lokti senden nung jembiba onük lir)

Akhi mapang Egypt chuba Fahrao tasü mang meremi ayuba (mummy), ali telong nung jagi pa tanelaji tepeladak bushia aotsü aser tesüsa Anubis tsüngremi pa mulungjangji ozü züng ka den odangtsü aser ozü züng dang nungi temulungjangji taretba süra paji tepeladaki maotsü saka ozü züng dang nungi temulungjangji tepungbaba süra shi azüi jangraba japujari mapa ajak inyaka jangratema chia jema pelatepdaki aotsü. Iba amaji Egypt nungertemia nisung ya tatem maka alir ta amanger. Ibayongji parnoki temang ya meraksai wazüka ayur mesüra ali nung aremer. Kasaji asenok Khristantemia sür shia aruba nung amanger, anungji asenok shi temang ya ken atema leper nung mejangba dak alaka tanelabo memejanger aser masür. Ano, Hindu nungertemibo nisung ka sür külena ano tangar tetsü bok nungi tanaben asor ta amanger. Ibayongji, nisung taküm tembanger külena aikati süogo ta mashir, saka pilaogo, passed away, departed ta dang ashir, tetezü nisungji tanaben taküm alitsü aser anosa ajurutsü. Anungji, asenoki asenok ya asütsü ta mebilemi Yisui Yohan 3:15 nung ashiba amaji 'teti taküm alitsü' ta amanga Kibubai mulungba mapabo maneni mazüngi inyaka atatsüla, iba jagi dang asen temang aser tanela na prongla arakzüka kümükümüküma alitsü.

" Tang nungi parnok arishi küm 120 dang alitsü." Lipok 6:3

Asenoki jungjunga asadanga bilemdangra, tanü 21st century yabo lanur putu masü saka tain putu lir, kechiyong tanü asen lima nung taküm alirtem rongnung lanurtem dang nungibo asenok amai tain, pensioner aser senior citizen teimba asütsü. Iba kuliji kibong kümaka tanur malir aser masor teimba aser aliyonga control asür, anungji nisung anati ka meyangluteter aser aika kibong nung nisung ana agi tanur ka dang yanglur. Aji oda, külen tanur kanga ajema asor aser ano külen nisung arishi talangba talangba akümer.

Iba jagi tanü putu nung yabo, alima nung nütsüng züinba aser ajemba nung Muslim nunger nütsüng mezüngokra, asenok ama kintem yabo lanurtem dang nungibo nütsünga taintem teimba aser tashia taintem taitba aser tuluba asütsü. Ibaji meteta asenoki asenoksasa kümükümshitetra, atangji, asenoki alima nung temelenshi tajung tulu bener arutsütettsü.

Aji oda, 19 century nungbo nisung arishi ya küm 40 nungi 50 tsüngda dang liasü aser iba sülen 20th century nung nisung arishi 60 nungi 70 tashi kümaka adok aser tang asenok 21st century nung alirtem arishibo 80 nungi 90 tashibo tashi itita alir. Aji oda, küm 74 sülen taruba 22nd century ajungdangbo nisunger arishi ya küm 100 nungi 150 tashibo litettsü aser oda-odabo nisunger arishi ya akhi putu ama noklang asem pezü tashia alitsü ta nisunger arishi indang shisadangertemi ashir. Idangjibo, alima nung nütsüng aika kümadoktsü, kechiyong idangjibo ano tasürtem dang nungi tasor teimba asütsü, anungji zünga rüzük karbo tanga planet nung oa ali tenzüksü. Aji koda tesüngmangtsü aser jangratemtsü !

Aji oda, asenok ya arishi talangba -talangba alitsü, anungji asenoki bilemba dang nungi talangba alima nung taküm alitsü. Ibaji mangatet ser asenok pensioner aser senior citizens rongnung kar danga yakta asütsü amai tasütsü indang dang bilema lira, yamaji tebilem saka na shi temang aser tanela kümükümshir, tang ya na arishi küm 30/40 tain amai dang bilemang aser tasü aser tashi itshir nai jangraba mapa tajung mazüngi inyaktsü tenzü kang.

Asenok ya government mapa nung inyakba mapang dang nungibo pension agia aliba mapangang talangba alir aser alitsü aser alima rongsen tsütsüa asenok mapai aidang anguba ita sen dang nungibo kanga agia tang anguba pension sen teimba ngua takar kümaka alir. Anungji, tanü ama asenok lokti telungjem sentep sentong agidang ya, asenok Pensioners' Telungjem ya tentetba nükjiong ya asen putu dak apet ulushidi ta shidanger, kechiyong iba telungjem ya tashi aser sempet tulu aika aketba telok tuluka lir, anungji telok tenteta yur küm nung khien yamai sentep ka agir senshitsü asen ano sangküma yamai khien ajurutepe sentep agir senshitsü ta kisüng asüba agi asenok shi aser tanela nung kümükümshitsü makoktsü. Ibaji jangramatem aser telok tentet malang. Ano, lotki tentet nung züngsem ka iba lima nungi piladang, asenok Pensioners tenüng nung nisung kati tepila o tatsüka shir envelope ka yimjak nung agütsüba toa mazümazür angur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

London nung Alpha Leadership Conference ayongzüka akatsü



October 04, 2025: London nung aliba Royal Albert Hall nung ayongzükbä Alpha International Leadership Conference nung linük balala nungi Khristan lenirtem aser denomination balala nungi Arogo lenirtem adentsü.

Iba conference ya sangküm May 4-5 anogotem nung ayongzüka akatsü.

Küm shia Alpha International- i ayongzükbä conference nung anogo ananü tashi onük balala nung o lemtepba den külemi tekülem sentong agir aser sarasademir.

Iba sentong ayongzükertemi ashiba agi, iba conference mapang ya Yisu ajurutsü, Tanela Temeshi agi asüngtsü aser Khrista tiyongtsü südaktsüba lenirtem kaka akümtsü maongka mapang ka asütsü.

London nung aliba Holy Trinity Brompton nung taoba mapang vicar aser Alpha International nung lenir, Nicky Gumbel-i, iba conference ajanga lenirtem longjemer Tsüngrem külemtsü aser kati ka

ajungshiteptsü atema maongka angur, ta metetdaksü.

Osangbener den jembidang Gumbel-i, "Alima tesem balala, sobaliba balala aser putu balala nungi lenirtem ka kuma longjemer Yisu ajurutsü aser Tanela Temeshi agi asüngtsü atema Leadership Conference ya maongka tajung lir," ta metetdaksü.

"Onok nükjidongji Khrista tiyongtsü südaktsüba lenirtem aika adokdaksütsü atema lir. Ibaji ajanga dang taküm aika melenshitsütsü aser alima melenshitsü," ta pai ashi.

Tesüiba kümtem nung iba conference nung lenir balalai tongti o jembia aruogo; o jembirtem rongnung taoba mapang Archbishop of Canterbury Justin Welby-a densema liasü. 2024 küm iba conference nung (asür) Pope Francis-i video conferencing ajanga jembia liasü.

Taküm May ita nung ayongzükbä conference nunga linük 82 nungi lenir 5,000 jungnüa

aden. Iba conference nung tongti o jembirtem rongnung Dr. Arthur Brooks, Priscilla Shirer, Dr. Johannes Hartl, Andrés Spyker, Bear Grylls aser Rachel Gardner nunger densema liasü.

Alpha International program ya session 15 lemsar agiba program ka lir. Tang linük 153 kübok tesem 39,000 nung Alpha International program lir. Parnoki talisa Tenla kidangi maoertem den Khristan tamang lemsateptsü nükjidong nung inyaker.

Alpha International program kübok chiyungdaksür aser pei teilemba lemsateptsü mesüra teratabatem asüngdangtsü atema maongka agütsür.

Tang tashi nung iba program nung nisung million 32 dak tali denogo aser aikati iba program ajanga parnok taküm melenshiba lemsatepogo.

2026 Alpha International Leadership Conference nung adentsü jangrartemi leadershipconference.org.uk/lc26 ajanga registration agitsü akok.

ANOGO ABEN TSÜNGREM DEN

MULUNGSENTSÜ TAJUNG ALIBA TAKÜM

"Shiri Khrista dak nenok jakla tajung atalar, nenok kechi indang nung atalar, iba indang nung parnok maksüdaksütsü asoshi nenok mulungsentsü tajung liang."

1 Peter 3:16

Nisung ka takümüji asoajen, sentsü, tobur ajung, kensü osü tanük aser ali rongsen jenti akaba agi mera keta nükshia merepranger. Kechiyong item ajakji nisung tsüngdang tema tereprangtsü dang, (make-up) yokba ama dang koba nung tashioktsüba tulu lir. Saka kecha agia nempangtsü makokba tobur ajung ka lir aser ibaji asen mulungsentsü tajung koba ajanga asen taküm rangben tobur jungdaksür.

Mulungsentsü tajungpurji cenema hall nung screen temes?ng ama lir. Iba screen temesüng nung ashioktsüba, azükba, tepsetba, ajepba, menütepba, pelatepba, tajung tamajung ajak adokdaksür, saka screen temesüng tobo teti süngjem süngjema dang alir.

Temeim adianutem, iba medemji alima nung tajung tamajung ajak aseni ajurutsü, aiben asen shi aser tanela nung yirutsüsa tensa mapang ajurutsü saka asen mulungsentsüji tajung süra item ajakji asenoki koktetts?. Mulungsentsü tajung, temerek nisung ajak den yimjung nung alir, ajaki meimer, nükshir aser sabur. Kecha makaba taküm ama süaka mulungsentsü dang jungerbo ajak kar. Kechiyong Tsüngremer temoatsütemji mulungsentsü tajunger madak alir. Kibuba nem asen shi mulungjang ?agütsüdi pai mulungsentsü tajung melentsütsü.

Pakistan nung pastor ka küm 13 jail nung puokba sülen chiokogo



Pastor Zafar Bhatti

October 04, 2025: Pakistan nung pastor ka tesüiba küm 13 tashi jail nung puokba sülen Brihostibarnü (October 2) jail nungi chiokogo.

Pastor Bhatti-i Tsüngrem mezüngmeshiogo, ta pa nem tai tongloksüba sülen 2012 küm July ita nung pa Rawalpindi nung aliba Adyala Central Jail nung pouka liasü.

October 2, 2025 nü Lahore High Court Rawalpindi Bench-i iba ken o nung arrshi küm 62 pastor, Zafar Bhatti maitsüi

chiokogo.

2012 küm pastor Bhatti-i ainkar Muhammad tetsü mezüngmeshia text message yok, ta pa nem tai tongloksüba sülen pa jail nung pouka liasü.

Pastor Bhatti atema ken o jembitsür, lawyer Saif ul Malook-i, pastor aitsütsüsa kuli tejangja mali, ta court nem metetdakja liasü.

"Ola recording kija nung ajemdaker aitsütsü makok," ta September 25 nü Malook-i court dang shia liasü, ta British Asian Christian Association-i metetdaksü.

Justices- Jawad Hassan aser Muhammad Waheed Khan nati iba ken o angadanga liasü. Pastor anema ken o jembiri court dang, text message yokba SIM card ji pastor Bhatti den sendaktepa lir, ta ashiba kuliji Justice Hassan-i magizük.

Justice Hassan-i, Pakistan telecommunications system ajanga SIM activate asüba mapang nung SIM card kiburji nüngdaker, anungji text message yokba SIM card ji pastor indang masü, ta shia iba ken o nung pastor maitsü.

Court-i iba ken o nung Bhatti maitsüba osang angazükba sülen Bhatti kinüngtsü, Nawab Bibi-i tepela nung ajep.

2012 küm Islamic lenir, Ibrar Ahmad Khan-i Rawalpindi nung aliba New Town police station nung pastor anema ken o benoka liasü. Iba mapang nungji Khan-i, register masüba phone number ka ajanga pa dangi tashishitsü text message kar yok, anungji ketdangsertemi ibaji bushisüngdang mesüra pai aniba organisation-i tashi amshia inyaksü, ta amokmerena liasü.

Iba nungji ajemdaker Police-i mejangjaba nisung ka anema ken o benok aser tesülen pastor Bhatti apu.

Asüngdangyaba mapang nung ketdangsertemi pastor dang nai aibelenogo ta nangzükang, ta shia pa reshikangshia liasü, ajisüaka pai menangzük.

Pastor Bhatti ya mozü ayoker ka liasü, aser pai kibok sema Laishiba azüngba den külemi pai semdangba kibongtem atema sarasademja liasü. Sensakertem yaritsü atema pai 'Jesus World Mission'

ta ser melugntet telok ka tenteta liasü.

Tashishitsü text message yokba SIM card ji Bhatti indang masü saka pa den külemi inyaksemer Ghazala Khan indang liasü. La-a 2012 küm November ita nung apu saka la tetsür asübayong 2013 küm April ita nung la bail nung chioka liasü. La 2016 küm November ita nung hepatitis C tashidak agi asü.

2017 küm May ita nung Additional District & Session Judge Mohammad Yar Gondal-i pastor Bhatti taküm piyong tepuokdak ayutsü obendang agüja liasü.

Pai iba obendang anema aiben temepishiba ken o benok, ajisüaka mapang talangka ken o atsülanga aruba sülen 2021 küm Lahore High Court-i iba ken o ya lower court ka nem agütsü. 2022 küm January ita nung Bhatti nem tasüba temerenshi obendang agüja liasü.

Küm aika charity telok asemi Bhatti atema ken o jembija aruogo.

Central Jail nung aliba mapang nung Muslim nunger aikati Islam yimsü dangi meyiptsü atema Bhatti rongshia liasü aser pa dak aiben azük.

2013 küm March 31 nü pa nem chiyungtsü nung miim inoker agütsüba sülen pa anogo aika teni-tebang nungi azü yima liasü.

Bhatti jail nung aliba mapang nung pa dak diabetes putet aser 2019 küm nungi 2020 küm tsüngda aiben temelungjang tashidak atua liasü.

Pa jail nung küm aika aliba mapang nung pa kinüngtsü Nawab Bibi (76)-a temang kanga mejungi akümba den külemi tenük külen apok. Taküm April ita nung la alanga tetsüng külen kosüka liasü. 2023 küm March ita nung BACA teyari ajanga la Islamabad nungi Lahore-i anir oa Khristan nütsüng aika aliba Youhanabad kiyong nung jenokdakja liasü.

Pakistan nung Tsüngrem mezüngmeshiba ozüng kübok mapang talangtiba tepuokdak ayusangji Bhatti lir.

AO OSHI ANGAZÜKDAK:**TANÜ ANGAZÜKTSÜBA OJANG****Tim****(n)** shitak (right, correct)

* Tsüraburi tanurtem dang tim agi sayutsüngitsüla.

Timatem**(adv)** okrong, tekangshi (suffer, trouble)

* Onok chiyongtsü maka kanga timatem.

OLONG PAITEP # 7290

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjiding - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7289 TELANGZÜBA**TIPIEN :**

1. Kilir, 5. Lasüng, 7. Samaru,
11. Jaka, 12. Naro, 15. Langzü,
17. Mapang, 18. Arong.

LANGTSÜNGLEN :

2. Lasa, 3. Kar, 4. Ana,
5. Langtsüng, 6. Sujong,
8. Rajem, 9. Arogo,
10. Tanela, 13. Züno, 14. Lao,
16. Ano.

NAI-A YA METETTER

United States kübok Alabama nung Rudolf Martino-i bangsemo feet 3 ser inch 6 awaba ajanga otsü tasek ka yangluogo. Rudolf ya 2015 nung Birmingham nungi California-i aru aser "longest natural beard locks on a living person" indang Guinness World Records naroküm ngutetogo.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

Kuki-Zo nungeri 29th Separation Day ayongzüka amung**Imphal, October 4, 2025**

(Agencise): Kuki-Zo nungeri October 3, 2025 nü Martyr's Cemetery Phaijang nung 29 buba Separation Day mungogo.

Iba ya Kangpokpi District kübok Sadar Hills nung lir aser Kuki-Zo nungeri ghonda 12 mokdanga Manipur nungi separate administration meshia takhangba agütsü.

Iba sentong nung naro yutsüba den gun salutes agütsü aser Committee on Tribal Unity (CoTU)-i MLA 10 dang India sorkari parnok political demands magizük tashi Manipur Legislative Assembly

nung madentsü ayongzü.

22nd Remembrance Day nung public-i onük 8 bangjemtepba nenshir aser India sorkari asenok taginübatem metongtsü tashi Kuki Zo nunger shinga ajemajema malitsü ta CoTU-isa metetdaksü.

Kuki-Zo nunger alidak Meitei nunger free movement malitsü aser separate administration nükjiding atongtsü atema ozüngi melaba ama mapatem inyaksü ta CoTU-isa ashi.

Kuki-Zo nunger MLA temi Meitei nunger teimba ser aliba

political platforms mesüra state sorkar nung pei ajangzüksü atema mejembitsüla ta parnokisa metetdaksü.

Manipur Governor-i Arambai Tenggol den olemtep aliba ya radical groups nem temeten agütsüba aser kin o kin tsüngda buffer zones tashi aittsü atema lir ta Kuki-Zo nungerisa aittsü.

Constitution of India nung Article 329A kübok Union Territory with Legislature ama Separate Administration meshiba nungi Kuki-Zo nunger kija, tanishirtem mesüra teloktemi matsüngshitsüla ta parnokisa metetdaksüogo.

Zubeen ken o atema GHC-i judicial commission ka tentettsü mulung**Guwahati, October 3, 2025**

(Agencies): Singapore nung Zubeen Garg ajungbena asüba bushisüngdangtsü atema Judicial Commission ka tentettsü mepishiba Gauhati High Court-i agizükogo.

Assam nung Criminal Investigation Department (CID)-i tai tonglokja alir nisung ana anema nisung tepsetba ken o benokba sülen anogo ka lir High Court-i iba temelaba agütsü.

Judicial commission ya sitting judge Justice Soumitra Saikia lenisüba kübok asütsü ta Assam Chief Minister Himanta Biswa Sarma-i ashi.

Iba commission tentetba nükjiding ya ajaki meima aliba kentener asüba jungjunga bushisüngdangtsü aser temeten agütsütsü atema lir ta paisa ashi.

Singapore nung Zubeen

Zubeen Garg

Garg mang nung post-mortem agiba report pa kinungtsü Garima Saikia Garg ket nung agütsüogo ta CM Sarma-isa ashi.

Gauhati Medical College Hospital (GMCH) nung post-mortem tanabuba agiba la nem agütsütsü ta paisa shisem.

Assam police nung Special Investigation Team (SIT)-i tang tashi nung Zubeen Garg asüba ken o dak sendakba nung nisung pezü pua lior.

Parnok ya Northeast India Festival tayonger Shyamkanu Mahanta, Zubeen Garg indang

manager Siddhartha Sharma aser musicians Shekharjyoti Goswami o Amritprava Mahanta nunger lir.

Parnok ajak anogo 14 atema police ket nung lir aser SIT-i asüngdangya südar.

Arishi küm 52 tain Zubeen Garg ya September 19 nü Singapore nung yacht outing mapang tzü nung arakset.

Iba benjung atema Goswami aser Amritprava Mahanta naprong Zubeen den Singapore nung liasü aser yacht outing nung tenaprong liasü ta police-i ashi.

Tepuokdak nungi jena aoba atema ketdangsür 5 mapa nungi anentsü**Agartala, October 4, 2025**

(Agencies): October 1, 2025 nü North Tripura district nung puoka alir nisung 6 jena aoba sülen Tripura sorkari ketdangsür pungu mapa nungi anentsüogo.

Dharmanagar Sub-Jail nung puoka alir nisung 6 jena ao. Parnok rongnung undertrial prisoners 5 aser life sentence nung ayuba Bangladeshi nunger ka dena lir ta Directorate of Prisons ketdangsür kati ashi.

Police-i jena aoer nisung anabo pua arutetogo aser kasa aonung undertrial prisoner Abdul Pata apu.

Parnokisa international border anasa Malakar Basti

nungi Narayan Chandra Datta apu. Pa ya tanur ka dak tashiyim agi shi nung medemba atema aija lir.

"Pai arrtsü adena aotsü merang asütsü akok. Onoki pa den yariteper local tout ka puogo" ta North Tripura District nung SP Avinas Rai-i ashi.

"Tanüngba nisungtem aputsü atema bushitepdar. Onoki team aika tentetogo aser tesem balala nungmita odar" ta SP Rai-isa ashi.

Tepuokdak ayurtem jagi hadir techira kar amshia jail guard amak aser sub-jail nungi jena ao ta osang angazüker. Anepdang parnok breakfast aser daily ablutions atema anir

aodang iba ya atalok.

Tepuokdak nungi ajenertemji Abdul Pata, Rahim Ali, Narayan Chandra Dutta, Rosan Ali, Nazim Uddin, aser Sunil Debbarma nunger ta jangjaogo.

Iba tatalokba sülen Inspector General of Prisons-i Jailor Dhananjay Bhattacharya aser warders Pallab Kanti Bhowmik, Prashikhan Jamatia, Mohammad Gedu Mia, o Notan Lodh nunger mapa nungi anentsüogo.

Mapa nungi anenja aliba jail staff pungu anema department-i disciplinary proceedings tenzüksü ta Jail Department ketdangsür kati ashi.

Indonesia school chirtepba lendong nung asür 14 jungogo



Indonesia kübok East Java, Sidoarjo district nung school ki ka chirepba sülen teküzmükertemi excavator amshia inyakba anüing ajanga tangokba noksa nung angur. Iba ki chirepba lendong nung asür 14 jungogo, ta ketdangsürtemi Honibarnü metetdaksü.

Jakarta, Mongputeni/October 4 (Agencies):

Indonesia kübok East Java province nung boarding school ka chirepba nung asür 14 jungogo, ta ketdangsürtemi metetdaksü. Teküzmükertemi ki chereper aliba nung rema alitsü ta bilemertem kümzüksü asoshi maneni inyakdar.

Sidoarjo jila nung amendaka aliba Al-Khoziny Islamic Boarding School Hombarnü chirepba mapang kaketshir noklang aika ki telung nung liasü aser mezüingbo nisung pongu asüba dang jangjar liasü. Kasa lendong nung kaketshir 100 shi yirua liasü.

National Disaster Mitigation Agency (BNPB) tekolakba Suharyanto-i Honibarnü osangbenertem dang ashiba agi, teküzmükertemi Hokolbarnü ano tasü mang teku ngutetogo aser iba ajanga asür ajak senteper 14 jungogo.

"Tanü tashi nung onoki maneni nisung 49 bushidar," ta Suharyanto-i ashiba broadcaster Kompas TV-i metetdaksü.

Asür timba ngutettsü akok, ta Suharyanto-i ashi. Teküzmükertemi kaketshirtem rema alitsü akok ta bilemba tesemtem merektettsü atema machine tulu amshia inyakdar.

"Yasüing tesüsabuba tasü mang ngutetba sülen onok machine tulu amshia iba tesem merektettsü atema rangloker inyakdar," ta pai ashi.

Suharyanto-isa, asürtem ya timba arishi küm 18 tekübok lir aser parnok maittsü jangjatsü atema timtemer, kechiyong parnok ket nung sorkar identity card tem mesüra fingerprint record kecha mali.

"Tasü mang karbo kanga mejungi yirur aliba ajanga merprangteter," ta pai ashi.

Ajak senteper iba lendong nung nisung 167 densema lir aser parnok rongnung nisung 104 bo ngutetogo aser kümzüka lir, ta BNPB nung Disaster Data, Information and Communication Centre tekolakba Abdul Muhari-i ashi.

Lendong nung yirur nisung 14 tang mozükidang temang

anepaludar aser nisung 89 chiokogo. Kaketshir kabo tanga mozüki kati belenerogo, ta Muhari-i shisem.

School ya kanga mejungi chirep aser iba chirepba ajanga kiyong ajunga anokshija liasü, ta iba tesem nung alirtemi metetdaksü.

Ki chirepba kuli jangjatsü atema bushisüingdangrtemi ken o asadangdar, saka ki ya osettsüset tamajung amshia yangluba ajanga ta sayur, ta mongintemi ashi.

Kasa mapang nung teküzmükba maparen inyaksü temela masü, kechiyong külen inyakdang vibration ajanga tanga tesem dak kongshitsü akok, ta ketdangsürtemi ashi.

Ajisüaka samar alir kinungertemi Brehostibarnü machine tulu amshitsü atema mulunga agizükogo, saka ki nung sabanger alirtem taküm alitsübo kangabo mimlar.

Maneni Mongolbar aonung menoknok ka anokba sülen teküzmükba maparen ya khen atema sota ata liasü.

Russia-i Ukraine nung passenger train ka amak

Kyiv, Mongputeni/October 4 (Agencies): Ukraine kübok northern Sumy tesem Russia drone amshia amakba mapang station ka nung passenger train ka dak kongshia nisung aika yirurogo, ta ketdangsürtemi Honibarnü metetdaksü.

"Russia-i drone amshia Sumy region kübok Shostka tesem nung railway station ka makogo," ta Ukraine tir Volodymyr Zelenskiy-i Telegram nung zülutsüba den train ronga aliba video ka lemsatepa liasü.

Paisa, iba lendong nung passenger aser rail nung inyakertem aika yirurogo, aser

medic aser teküzmükertem iba tesem nung inyakdar, ta ashi.

Local district administration tekolakba Oksana Tarasiuk-i Ukraine indang public broadcaster dang ashiba agi, iba lendong nung nisung 30 yirua liasü. Ajisüaka lendong nung nisung asüba osangbo kecha mali.

"Rusia nungertemi parnoki civilian tem amaker ta meteter liasü. Iba ya kiralongrar inyakyim lir, koba alimai odangbo sentong metoktsütsüla," ta Zelenskiy-i zülutsü.

Moscow-i taoba ita ana tashi Ukraine indang railway infrastructure anüing ajanga anogoshia amai maka arudar.

Iran-i Israel den sendaktepa alir nisung trok tepset

Tehran, Mongputeni/October 4 (Agencies):

Southwest len amendaka aliba Khuzestan province nung sorkar anema raraba atema Iran-i nisung trok tepsetogo, ta state media sangdong ka ajanga metetdaksü.

June ita Israel aser United States na den anogo 12 raraba sülen Iran-i Israel den sendaka alirtem maneni tepsetyonga arudar.

"Separatist terrorist trok, shirnoki kümtem tsüingda Khuzestan province nung security amakba den bomb poklokja aruogo parnok tanep züingia lia tepsetogo," ta judiciary-i Honibarnü Mizan website ajanga metetdaksü.

Honibarnü tepsetertem maittsü aser parnok kodang aser kechiba apu aser tasüba agi merenshitsü atema obendang agütsü, indang osang tejangja magütsü.

Ajisüaka Mizan website ajanga ashiba agi, parnok ya 2018 aser 2019 küm police ketdangsür ana aser Basij paramilitary force züingsem ana densema security personnel pezü tepsetba nung densema liasü.

Osang ajangsa, parnoki bomb yanglua rema toktsüba aser Khorramshahr gas station poktoktsütsü atema sentong yanglua mapa benoka inyakba nangzükogo, ta ashi.

Iran-i yimya agi, nüjiso bushirtem aser kiralongrartem ya Israel den sendaktepa alirtem ama züingshir.

H o n i b a r n ü s a , ketdangsürtemi Tsüingrem anema rara menaba atema Kurdish fighter Saman Mohammadi tepsetogo.

Mohammadi ya 2013 küm apu aser pa 2009 küm Sanandaj yimti nung Hokolbarnü sarasadem imam tepsetba aser rakzükkrakdemba aser nisung pur aoba ken o nung densema liasü.

Iran-i Bahman Choobiasl aletseta südaksüba sülen hopta ka majung tsüingda tang item nisungtem tepsetogo. Choobiasl ya Iran nung Israel atema idangiter tongtimbang rongnung

ka liasü ta ashi.

Mizan-i ashiba agi, Choobiasl ya Israeli spy agency, Mossad nungi ketdangsürtem den ajurutepba atema tepset.

Mizan-isa, Choobiasl ya telecommunications project tongtimbangtem nung inyaka liasü, ta metetdaksü.

Iran indang Supreme Court-i pai mepeshiba magizük aser ali anema inyakba asoshi pa aija tasüba agi merenshitsü asoshi obendang agüja liasü, ta kasa sangdong ajanga metetdaksü.

Israel den küm aika tanga telok balala ajanga rara aruba sülen June ita linük ana tsüingda rara adok. Iba sülen Iran-i Mossad den sendaktepa aliba aser Iran nung parnok inyaksangshitsü atema teyari agütsüba asoshi nisung aika tasüba agi merenshia arudar.

Israel-i June ita Iran nunger general aser nuclear scientist tem aser nüburtem aliba tesemtem amak tenzüka sülen linük ana tsüingda anogo 12 tashi rara liasü. Iran-ia telangzüba agüja missile aser drone noklang aika yoka liasü.

Kasa mapang nung US-ia Israel tenüing nung Iran indang nuclear site tem maka liasü. Amnesty International-i ashiba agi, Israel-i Iran amakba mapang nisung 1,100 tepsetogo.

June ita rara, küm tem tsüingda rongsenketzüing jenjang mejungi akümba, tetsür temeden atema longkak aitba aser nisung karibo yimsüsüba melenshitsü atema akhangba mapang Iran-i nisung aika tasüba agi merenshitsü asoshi obendang agütsüogo.

Oslo nung amendaker aliba Iran Human Rights aser Washington, DC nung amendaker aliba Abdorrahman Boroumand Center for Human Rights in Iran nati ashiba agi, 2025 küm nisung 1,000 dak tema tepsetogo, saka tepsetertem ya timba asütsü akok, kechiyong Tehran-i parnoki tepsetba ajakbo memetetdaksür.

Iran ya China sülen nisung timtiba tasüba agi merenshiba linük lir, ta Amnesty International densema human rights telok balalai shia arudar.



CHRISTIAN HIGHER SECONDARY SCHOOL

NYAMO LOTH ROAD, DIMAPUR 797112, NAGALAND
E-mail: christian.dimapur@gmail.com / Website: www.chssdimapur.in
Motto : **IN LOVE AND TRUTH WE STRIVE**

WE DESIGN YOUR CHILD'S FUTURE: WE BUILD YOUR CHILD'S CAREER

ADMISSION FORMS AVAILABLE

For 2026 session (Classes A-8)
available during office hours
(9:00 am to 2:00 pm)

LIMITED SEATS

SPECIAL FEATURES

- Smart Board Classrooms
- Robotic Lab (ATL)
- Scripture Retreat & Counselling
- Career Guidance Cell
- Summer Bible School
- Hostel for Boys
- NCC
- Scouts and Guides
- Club Activities
- Bus Service
- Wordsworth Language Lab
- Clinical Psychologist

NSF MM Trophy: Mao SU & Dimapur Chaos-i takok angu



NSF Martyrs Memorial Trophy nung October 4 nü asayaba noksa nung angur.

Dimapur, Mongputeni/October 4 (TYO): NSF Martyrs Memorial Trophy nung October 4 nü asaya Mao Students Union aser Dimapur Chaos nati pei tata asaya kokogo. Iba asayamung ya Naga Students Federation aser Angami Students Union nati ayongzüka Indira Gandhi Stadium Kohima nung asayadar.

Honibarnü mezüngbuba asaya nung Mao Students Union-i Phesama Students Union goal 5-1 agi kokogo.

Asaya nung Lohrü-i Mao SU atema minute 19 aser 38 nung goal ana idaktsü aser

Ngararsing, Athili aser Salam Swami Chandar nungeri minute 64, 67 aser mapa apuloktsür asayaba mapang goal kaka idakja liasü.

MSU nungi Lohrü Kaisii nem NSF tir Mtseisuding Heraang-i player of the match naroküm agüja liasü.

Phesama Students Union atema goal ka ya Mezhiilhoulie Zashümo-i minute 71buba nung idakja liasü.

Tasembuba round nung tatemangbuba asaya ya Dimapur Chaos-i goal 2-1 agi Football 4 Change Manipur kokogo.

Dimapur Chaos atema mezüngbuba goal Gangchui-i

asaya mezüngbuba shilem madem tsüngda idaktsü saka F4C nungi asayar Seiminthung-i minute 57buba goal ka idakja kasa aküm. Ajisüaka Gangchui-i ano Dimapur Chaos atema minute 88buba nung tanabuba goal idakja parnoki asaya akok.

Iba asaya atema Gangchui nem Director, Department of Youth Resources and sports Kethosituo Sekhose-i player of the match naroküm agütsü.

October 6 nü asaya:

1. Rever Gangtok vs Chedema Village Youth Organisations @12noon

2. Tangkhul Katamnao Saklong vs Mez & Co @2pm.

SHANGHAI MASTERS:

Minaur & Yoshihito natasembuba round-i iogo

Mongputeni/October 4, 2025 (Agencies): Australia nunger nüntugu tennis asayar Alex de Minaur-i Shanghai Masters tanabuba round nung Argentina nunger asayar Camilo Ugo koka tasembuba round tongtetogo.

Honibarnü Shanghai Masters tebur kija asaya tanabuba round nung De Minaur-i 6-4, 6-2 agi straight game nung Camilo Ugo madak takok ngua liasü.

Kasa asayamung tanga asaya ka nung Japan nunger asayar Yoshihito Nishioka-i 2-6, 6-1, 6-4. agi Russia nunger asayar Andrey Rublev kokogo.

Tebur kija asaya nungsa Canada nunger asayar Felix Auger Aliassime-i Alejandro Tabilo 6-3, 6-3 agi ayong ayonga kokogo aser Kamil Majchrzak-i 29 seeded America nunger asayar

Brandon Nakashima 6-4, 6-0 agi straight games nung kokogo.

Iba hopta tetenzüklen China Open semifinals nung De Minaur Italy nunger asayar Jannik Sinner-i tsükdakja liasü. Iba asaya makokba densema Australia nunger asayar yagi Italy nunger asayar ya 11benbuba atonga makok.

Shanghai nung top-seeded asayar ajak nem mezüngbuba round atema bye agütsüogo. Sinner shibai Beijing nung China Open koka liasü, pa tanabuba round nung Daniel Altmaier den asayatsü liasü.

Maneni top seed asaya Carlos Alcaraz, shibai taoba hopta Japan Open koka liasü, pai iba asayamung akokba sülen pa Shanghai nung masayatsü ta sangdonga liasü. Pa temang nung timtem kar aliba ajanga iba telemtetba ya agia liasü.

Australia den ODI asayamung atema Rohit & Kohli na shimogo



Rohit Sharma aser Virat Kohli

Mongputeni/October 4, 2025 (Agencies): Australia den October aser November ita asayatsü aliba asayamung atema BCCI-i squad sangdongogo. Iba asayamung ya ODI asem asaya tenzüksü aser iba sülen T20I pongu asayatsü.

Iba asayamung nung ODI nung Rohit Sharma aser Virat Kohli nata asayatsü. Tena tesüsa taküm Champions Trophy nung asayaogo. Tenaprongla 2024 T20 World Cup akokba sülen T20I asaya nungi anenogo aser tawa Test cricket asaya nungia anenba sangdongogo. Iba team ya Shubman Gill lenisüba nung asayatsü, kong asayar tejentem aser tasentem ajak meyoktepa lir.

Australia den ODI asaya atema Shubman Gill captain asütsü aser Shreyas Iyer vice captain asütsü shimogo.

India's ODI squad nung Shubman Gill captain, Rohit Sharma, Virat Kohli, Shreyas Iyer vice-captain, KL Rahul

wicketkeeper, Axar Patel, Nitish Kumar Reddy, Washington Sundar, Kuldeep Yadav, Harshit Rana, Mohammed Siraj, Arshdeep Singh, Prasidh Krishna, Dhruv Jurel wicketkeeper, aser Yashasvi Jaiswal nunger densema lir.

T20I squad nung Suryakumar Yadav captain aser Shubman Gill vice-captain asütsü. Team nung Abhishek Sharma, Tilak Varma, Nitish Kumar Reddy, Shivam Dube, Axar Patel, Jitesh Sharma wicketkeeper, Varun Chakravarthy, Jasprit Bumrah, Arshdeep Singh, Kuldeep Yadav, Harshit Rana, Sanju Samson wicketkeeper, Rinku Singh, aser Washington Sundar nunger lir.

ODI asayamung ya October 19 nü Perth nung asaya-a tenzüksü aser iba sülen October 23 nü Adelaide aser October 25 nü Sydney nung asayatsü. T20I asayamung ya October 29 nungi November 8 tashi asayatsü.

India Vs WI: India-i mezüngbuba Test kokogo



India aser West Indies na tsüngda mezüngbuba Test asayaba noksa nung angur.

Mongputeni/October 4, 2025 (Agencies): India aser West Indies na tsüngda mezüngbuba Test asaya nung vice-captain Ravindra Jadeja tasembuba anogo kanga junga asaya-a India team takok dangi anigogo.

Hokolbarnü India-i asayar 5 out sür run 448 yangluer aliba mapang declare asü aser parnok run 286 agi tekjaktang liasü. Iba asaya nung Jadeja-i out mesüi century ka yangluba sülen wicket pezü agia, WI team nem run 146 dang yangludaktsür over 45.1 nung asayar ajak out sütsüba nung teyari tulu agüja liasü.

Iba asaya ya India-i run 140 aser innings ka agi anogo asem tsüngda koka iba asayamung nung parnok 1-0 agi tekjaktang lir.

West Indies pur tanabuba innings run agika tesülen sür

tenzük aser tetenzük nung timtema liasü. Asaya nung Jadeja-i mapang tatsüka tsüngda John Campbell (run 43) aser Brandon King (5) na out sütsü aser iba sülen Shai Hope aser Johann Layne na out süja liasü.

Tasemnübuba Mohammed Siraj-ia ball kanga junga aon aser pai opener Tagenarine Chanderpaul (8) densema wicket asem agia liasü. Maneni Kuldeep Yadav-i wicket ana agi aser Washington Sundar-ia Alick Athanaze out süja liasü.

West Indies indang tanabuba innings ya India-i amokbanger asaya aser WI pur mezüngbuba wicket pongu ya run 46 dang yanglur out süatok. Asaya nung Alick Athanaze-i run 38 aser Justin Greaves-i run 25 yanglua tenati team jenjang yanglushitsü meranga liasü. India team-i extra run pongu dak agütsü aser iba ajanga team-i run magütsüi

kanga junga azüoka asayaba sayur,

Captain Shubman Gill-i post-match presentation mapang team tenüngsanga jembioago aser ashiba agi, India asoshi iba asaya ya kanga tetemsü asayaka liasü, kong asayar asem tashi century yanglur aser fielding-a kanga junga menogo.

Opener Chanderpaul aser Campbell nati mezüngbo kanga junga asayatsü ama sayua asaya, saka Siraj-i ball aonba mapang Nitish Reddy-i square-leg nung ball kanga junga ajepzüka mezüngbuba asayar out sütsü. Iba sülen Jadeja-i middle order tem loksatsü aser KL Rahul aser Yashasvi Jaiswal natia fielding nung catch tajung süa asayartem out sütsü.

Team ana tsüngda tanabuba Test asaya New Delhi nung October 10 nungi 14 tashi asayatsü atakzüka lir.

BILEMDANGANG

“Mapa kecha metenzükdang, koma tempangtsüar aji mezüng angazükang”